



Toujours miserable sera
 Aueugle fol cil qui naura
 De ses enfans aucune cure
 Et peine ne met ne procure
 De les eriger en vertuz
 Quant sont de vices abatus
 Pour temperer la mort qui vient
 Sur eulz ce qui souuent adient
 Par leurs oeuvres continuelles
 Deraisonables et mortelles
Aussi cil qui ne les deuoye
 Ne leur clost de vices la voye
 Mais les laisse tout au deliure
 Est plus fol que nest vng homme pure
 Car de veoir ses filz sans default
 Et sans coulpe ne luy en chault
Helas ce nest pas bien veille
 Par les peres ne conseilse

Que voluntueuse ieunesse
 Qui ne demande que liesse
 Vague par tout sans bon ducteur
 Car ainsi comme sans pasteur
 Laisent leur chemin les ouailles
 Par volupte qui leurs oreilles
 Soufle et les fait par champs courir
 Dont bien souuent les fait mourir
 Le loup qui alors les peult prendre
 Ainsi va si tu sces comprendre
 Des enfans qui sont sans regime
 Qui nont homme qui les regime
Pere fol pere assoti
 Pere incense pere abeti
 Quant tu vois tes filz accuser
 Dy pourquoy les biens excuser
 Disant quilz ont lespit trop tendre
 Pour scauoir mal et bien entendre
 Et de verite le dray cours
Laage petite les ans courts
 Le visage sans barbe frois
 Ne les excusent. et me crois
 La sapience croist es meurs
 Tendres. et dispose liqueurs
 Et doctrine de sainte vie
 Car science plustost se auie
 Es ieunes que ne fait es vieulx
 Aussi retiennent beaucoup mieulx
Grace dit que si tu prens
 Vng nouueau testz et metz dedens
 Liqueur qui lors bon fleurera
 Jamais lodeur ne sortira
 De ce testz ains a tousiour mais
 y demourra pour tout iamais
Contemple bien aussi. si on
 fait pas ce quon veult dung sion
 Et le met on en toutes sortes
 Mais des branches grosses et fortes
 Nen fait on pas du tout ainsi
 Je te pry contemple cecy
 Que fais tu que tu nensumines
 Tes enfans de belles doctrines

Oratius

Oratius